



3. Marts 2016

Inatsisartut suleriaasianni § 33 naapertorlugu aaliangiiffigisassatut siunnersuut imaattoq matumuuna saqqummiuppara:

Ernup nukissiorfiup Qorlortorsuarmitup sarfamik tunisisinnaanerata annertusarneqalerneranut atasumik, Alluitsup-Paa allanit salliutillugu, Qorlortorsuarmit nukissiorfimmit sarfamik pilersorneqalernissaa siunniullugu, Naalakkersuisut UKA 16-mi saqqummiunneqartussamik, qanoq naleqassanerani pilersaarusiamilu suliaqassat Inatsisartut aalajangiiffigisassaattut siunnersuut. (Inatsisartunut ilaasorta, Kalistat Lund, Inuit Ataqatigiit.)

Tunggavilersuut:

Qorlortorsuarmit sarfaliorfiup annertusaavigineqarnissaa aningaasaliiffigineqarluni siunniunneqarmat nalilersorneqarniartut ilagaat, siunissami aatsitassarsiorfinngorumaarsinnaasunut sarfaliorfiup aamma atorineqarsinnaajumaarnerata misissorneqarnissaa.

Isumaqarpunga qularnaatsumik ullumikkut aalajangereersinnaagipput sarfaq pilersinneqartussaq tamaat uagut maani nunatsinni ullumikkut pisariaqartillugulu atorfissaqartereeratsigu, suliffeqarfinnut pilersinneqarumaarnerinut suli aalajangiisoqarnanilu ilisimaneqanngitsunut pissamaassiunneqarnissaa pissusissamisunngitsoq.

Inoqarfinni periarfissaqarfiusuni ineriartornissamat aallaaviusinnaassunik iliuuseqartoqartariaqarpoq. Nunatta siunissaa ilusilersorneqartariaqarpoq maanni nunami najugallit najugaqartuurtussallu aallaavigalugit, aningaasat patsisigalugit maanni nunatsinniittut aallaaviutikkunnaarlugit. Maannamat ineriartortitseriaaseq nunatta aningaasarsiupallafissaannartut periaaseqarfigalugu aqaguinnangajammut isigisumik pilersaarusiortarnerit kinguaasatsinnut artukkiisutaasussaapput.

Alluitsup Paa inoqarfingaatsiarujussuuvoq ineriartorfioqqilernissaannik aamma periarfissiuunneqartariaqartoq. Alluitsup Paa Qorlortorsuarlu nunami ataatsimi imminnut qanikannerlutik inissisimapput, soorunami sarfamik sinneruttoqassappat pissusissamisoornerpaajuvoq Alluitsup Paarmiunut tamanna iluaqutissanngortinneqassappat.

Nunatsinni inerisaanerit ingerlanneqartariaqarput siunissami qanoq ineriartortoqarnissaanik siunertaqarnerput aallaavigalugu. Kissaatigutsigu inoqarfiit inuussutissarsiutitigut ineriartorfiunissaminut periarfissagissaartut ineriartorfiussasut taava tamatumunnga kivitsissutaasussanik iliuuseqartarnissarput pisariaqarpoq. Nunarput anersaaqqarfigalugu ineriartortittariaqarparput, inuussutissarsiorfittut periarfissagissaarfiusut arlaanik patsiseqartumik unikaallakkiartulersimappata taava kivitsissutaasussanik iliuuseqarnissaq pisariaqalersimassaaq. Nunarput nunaguagassarigatsigu minnerunngitsumik kinguaasatsinnit iluaqutigineqartussanik nunatta ilusilersornissaa tunuarsimaarfigissanngilarput.

Savalimmiormiut illaruaatigineqallattaartarput ileqimisaartularutigineqartarlutillu nunartik sulluliat iluaqutigalugit tamakkeriartuurlugu maannamat suli aqqusersormassuk. Taamaaliortut nunaminni periarfissagissaarfiusut tamarmik atorluarneqarnissaat pisariaqartikkamikku aamma ukiut 100-t qaangiuppata kinguaariinnit iluaqutigineqarniassammata.

Alluitsup Paata Qorlortorsuarmit sarfamik pilersorneqalernissaanik siunniussaqaqarnissaq ilisserutaassaaq nunatta sinnerani nukissiuuteqarnikkut qanoq periuseqarnissatsinnut.

Nunatsinni tamarmi illoqarfiit nunaqarfiillu inuussutissarsiorfittut ingerlatsiffiunissaminnut periarfissallit erngullu nukinganit sarfamik pilersorneqalerumaarnissaminnut periarfis-salimmiittut tamarmik pilersaarusiorfigineqartariaqalerput piviusunngortikkiartaalerlugillu.

Akilersinnaannginneraalluni naliliisarnert "sammivimmit allamiit isigalugit" nalilerneqartartariaqalerput, kinguaariinnut sunniutigisassaam aamma ilanngullugit.

Taama tunngavilersuuteqarlunga neriuppunga paaseqatigiiffigissagipput maani nunami najugallit salliutittuarlugit ineriartorneq ingerlanneqartariaqarmat minnerunngitsumik ukiuni makkunani aatsitassarsiorfiit pigaluttuarnerannik ilimasulersimanitsinni.

Aatsitassarsiorfinngoratarsinnaasuniit Alluitsup Paa pioreersoq salliulluni Qorlortorsuarmit sarfamik pilersorneqalernissaa siunniunneqartariaqarsoraara.

Pisortanut aningaasatigut allaffissornikkullu kingunerisassat.

- Sarfamut aqqusiineq 85 mio. Kr.-nink akeqassasoq missingerneqarsimavoq. Tamatuma saniatigut ukiumut aserfallatsaaliinermut 200.000 kr.-nink akeqartassasoq missingerneqarsimalluni.
- Allaffissornikkut ullumikkut atorneqareersut taamaaginnassasut naatsorsuutigineqarpoq.

Namminersorluni inuussutissarsiuteqarnermut aningaasatigut allaffissornikkullu kingunerisassat.

- Namminersorlutik inuussutissarsiortut ukiuni aggersuni sarfamut KW/t-mimut akigitinneqartut annikilliarturnerannit iluaquserneqassapput.
- Allaffissornikkut soqanngilaq.

Innuttaasunut aningaasatigut allaffissornikkullu kingunerisassat.

- Innuttaasut ukiuni aggersuni sarfamut KW/t-mimut akigitinneqartut annikilliarturnerannit iluaquserneqassapput.
- Allaffissornikkut soqanngilaq.